soi *super* loco. Quanto a Goricia, era sua; pur, si la Signoria havia raxom, la ponesse al conseio di Augusta o altrove a veder; et cussi ritornò a caxa.

Dil ditto, di 23, ivi. Come la dieta era terminà dar al re 20 milia cavali et 30 milia pedoni, pagati per 6 anni, per il ben di l'imperio; et è capetanio il ducha Zorzi di Baviera, cugnado dil re e barba dil marchexe di Mantoa, et ha 18 al governo: zoè 6 per li principi, 6 per li ecclesiastici, 6 per le terre franche; et si dà al capetanio 25 milia fiorini; et ivi si trova el cardinal di San Severim e altri milanesi, sperano assai la recuperation dil ducato di Milan. Et il re di Franza à assa' amichi in Elemagna, et era li de li electori solum lo episcopo di Maganza, et il ducha Federico di Saxonia. Et hessendo lui li, vene el marchexe de Brandiburg. Item, che a li do electori presenterà le letere dil roy, licet non siano amici di soa majestà. Item, era stato orator dil roy lì, a dimandar li fioli dil Moro, et promete farli homagio, quando a soa majestà piace. Et il re non l'à voluto darli 0 risposta bona. Et li manda tre oratori al roy: el ducha Federico di Saxonia, elector, lo episcopo di Vormes, el conte di Naxò per dimandarli Lodovico e Ascanio e il stato di Milam. Et che il ducha Alberto di Saxonia, gran capetanio, è occupato a l'impresa versso Frisia, qual era in governo di uno suo fiol, e li populi lo à retenuto per li malli portamenti; et è fortissima provintia, maxime de inverno, per le aque e giaze. Item, li è uno orator yspano, qual lo cognossè a Zenoa, si ofersse a esso secretario; et è etiam domino Francesco de Montibus, orator neapolitano, stato gran tempo de li. Item, è do oratori di Hongaria e Polana, venuti per haver qualche socorso di zente contra turchi, e il polono per haver il possesso di una sua terra. Et noviter è venuto uno altro messo di Hongaria al re, e dice non è seguito ancora l'acordo con la Signoria. Item, chome il re di romani do zorni da poi mandò per lui, e li dè la risposta in scriptis, ut patet, a le tre propositiom fate, chome ho scripto di sopra. Li rispose; e più di Goricia, ch' è al confin dil turcho, et che la Signoria à ben di altri luogi etc.; et dè licentia a esso secretario si partisse. E lui li dimandò potesse star tre zorni lì, perchè era amallato; et cussì che a di 27 si partiria. Voleva scriver a la Signoria, prima si partisse; ma lhoro non volseno aspetasse li la risposta.

Di Ferara, dil vicedomino, di 28. Come il ducha è partito per Mantoa; va con lui don Alfonxo suo fiol, missier Zuan Lucha e pochi altri; va per barcha. Et missier Zuan Valla tornò di Mantoa; et par li andasse nomine regis Franciæ, ma più presto per li comessarij regij sono a Milam. *Item*, di le zente di francesi stanno cussì dove erano, et come succederà dil papa, cussì si governerà. Et si dice il ducha va a Mantoa per batizar il fiol primogenito dil marchexe 221 suo zenero, et il marchexe saria venuto a Ferara, si non fusse à 1800 homeni a farli le spexe.

Da poi disnar, fo conseio di X con zonta di colegio, et vene molte letere. Il sumario è qui di soto. Et fonno fati capi di X, sier Bortholamio Vituri, fo consier, sier Marco da Molin, fo cao dil conseio di X, et sier Anzolo Trivixan, fo cao.

Di Hongaria, di oratori, date a Buda, a di 13. Come eri vene lì l'orator dil papa, episcopo caliense; li andono contra con li oratori francesi, e do altri veneno per nome dil re, e pochi cavali. Item, ozi fono a disnar col re li oratori francesi, e quel di Polana; e poi disnar fè cavalieri li do oratori francesi, e uno fiol dil mazor orator. E poi essi nostri oratori fono da l'orator pontificio, e parlono insieme. Item, non è restati di solicitar con la regia majestà, si mandi zente a li confini, e si corra su quel dil turco; et che l'orator polono si partite; et il re à donà a li oratori francesi una vesta d'oro vechia, fodrà di armelini, per uno; e al fiol una vesta di seda turchescha, fodrà di dossi, fata a la ungarescha, qual val pochi soldi; et è stà donà 4 cope dorate et do ronzini a ditti oratori.

Di li ditti, di 16 et 17, ivi. De coloquij abuti col re zercha la liga, e poi fonno mandati da parte con il reverendo vstrigoniense, vesprimiense, e missier Josa; tandem il re conclude in ducati 100 milia a l'anno, e disse: Si volè, bene quidem, si non, non parlè più; et farà la liga particular, et di la liga general non ne parlè. E disse molti signori christiani li vol dar ducati 150 milia, et el si acorda contra la Signoria nostra, et li à dà termene zorni XX a responder; et li nostri oratori oferse ducati otanta milia, et poi 70 milia a l'anno, e lhoro non volseno questo. Et licet essi oratori havesseno libertà di prometerli ducati 100 milia, tamen non volseno per il capitolo di tartari, perhò che il re disse voleva prometer per il fradello polono, per non esser orator di quel re de lì. E disse, si tartari li movesse guerra a ditto suo fradello, comme mosse, vol se intendi quel re possi atender contra di lhoro e non contra turchi. E disse, il re sollo li bastava l'animo di obstar a' turchi; et statim, conclusa la liga, bisogna li danari per tanta impresa; et il re licentierà l'orator dil turco, qual è con boche 130 li, e li dirà, digi al suo signor, non vol ni paxe ni triegua. Et il re vol andar a Belgrado, e redur il campo insieme. E disse quelli